

庚寅開春奉寄故人詞稿

劉衛林

西江月 庚寅發歲奉寄故人

身外歲華冉冉，江南春草迢迢。東風明日又花朝，桃李迎人淺笑。
永憶南村接席，天涯延佇遐遙。芳菲時節好招邀，杖屨同尋窈窕。

點絳脣 肇平詞丈賜示疊和點絳脣新作謹再依韻奉和

夜雨燈前，正思何日裁春韭。停雲寫就，又值芳時候。
妙筆青蓮，敏捷詩千首。聲名久，夢隨君後，應憶城東友。

臨江仙 次志清兄韻並柬祥麒兄 除夕

兩夕花朝經歲晚，鞍山淑氣涵空。窗前春水酒光穠，青歸堤上柳，
暖入夕陽風。最愛新詞先寄我，綵毫應羨文通。江山銜思興何窮。
幾時攜旨酒，一醉與山公。

金縷曲 奉和志清祥麒二尊兄並柬唱和諸吟侶

又值佳風候。共迎春，琳琅滿紙，逸懷軒秀。淑氣晴光欣發歲，顧
念物新人舊。賡迭和，高才八斗。青眼憐君偏向我，幸經年、奔
軼從君後。傾意氣，寸心剖。花時賦詠深情厚。接傳書，欣開瑤
札，馨香盈袖。金縷清歌良祝願，儔侶英華騰茂。更盼得，故人長
久。洛下春回花似雪，夢魂中、想見城東友。同屬句，勸杯酒。